

Japan podržava ujedinjenu Evropu i potiče put BiH ka EU

Izuzetno mi je drago da sam danas dobila priliku posjetiti Bosnu i Hercegovinu.

Japan je odmah po završetku rata u januaru 1996. godine priznao državnost Bosne i Hercegovine, a u februaru su uspostavljeni diplomatski odnosi ove dvije zemlje. Kako bi se očuvao teritorijalni integritet i suverenitet Bosne i Hercegovine, podržala etnička raznolikost, te osigurala politička stabilnost i ekonomski razvoj, Japan je u proteklih 28 godina, kao članica Vijeća za implementaciju mira (Peace Implementation Council), aktivno djelovao u rehabilitaciji i razvoju zemlje, kao i u izgradnji povjerenja, a uz saradnju sa međunarodnom zajednicom i kroz podržavanje aktivnosti visokog predstavnika.

Japan je također konstantno uključen u pitanja regije Zapadnog Balkana. U okviru Inicijative za saradnju sa zemljama Zapadnog Balkana, koja doprinosi miru i stabilnosti u Bosni i Hercegovini i regionu, mi podržavamo pomirenje i socio-ekonomske reforme ove regije koja je nekada ispaštala zbog podjela. Od pokretanja ove Inicijative 2018, povećan je broj posjeta visokih zvaničnika, posebno u BiH, koja je u posljednjih 6 godina imala dvije posjete ministara vanjskih poslova Japana. Danas, kada je međunarodni poredak suočen s teškim izazovima, smatram da je za mene, kao ministricu vanjskih poslova Japana, značajno posjetiti region Zapadnog Balkana, koji je u prošlosti bio pogođen tragičnim sukobima, i da ovdje otvoreno razgovaram sa ljudima u regionu o neprocjenjivosti mira.

Ukupan iznos pomoći koju je Japan pružio BiH preko JICA i drugih organizacija do danas premašuje približno 380 miliona eura. Na primjer, 155 autobusa koje je Japan isporučio

gradovima Sarajevu, Banjaluci i Mostaru 1998. godine, poznatih kao žuti autobusi, doprinijeli su etničkom pomirenju i bili su popularno prijevozno sredstvo građana.

Pored toga, na području Srebrenice, gdje se dogodila najveća tragedija u Evropi nakon Drugog svjetskog rata, pružili smo pomoć stanovnicima koji su bili lišeni sredstava za život i primorani da žive u teškim uslovima, da ponovo izgrade svoju ekonomsku bazu usredsređenu na poljoprivredu. Ova podrška je realizovana bez obzira na etničku pripadnost, a doprinijela je i izgradnji povjerenja među stanovnicima, te je kao podrška koja ima za cilj revitalizaciju života građana Srebrenice jako hvaljena i od samih građana.

Japan i BiH su produbili odnose i kroz sportske razmjene. Čula sam da je zastava Bosne i Hercegovine prvi put prikazana na međunarodnoj sceni na Zimskim olimpijskim igrama u Naganu 1998. godine. U Bosni i Hercegovini je fudbal, nacionalni sport države, ključan za razmjenu između naših zemalja. Tako su od 2006. godine gospodin Ivica Osim, od 2015. gospodin Vahid Halilhodžić bili selektori japanskog nacionalnog tima i doprinijeli poboljšanju nivoa japanskog fudbala.

Inicijative za budućnost: Japan podržava ujedinjenu Evropu sa kojom dijeli temeljne vrijednosti kao što su sloboda, demokratija, ljudska prava i vladavina prava, i drago nam je što je u martu ove godine donesena odluka da Bosna i Hercegovina započne pregovore o pristupanju Evropskoj uniji. Japan očekuje da će Vlada Bosne i Hercegovine napraviti napredak u raznim reformama kako bi pristupni pregovori mogli započeti što prije, i nastaviti će da podstiče BiH na tom putu.



Piše: YOKO KAMIKAWA

Ministrica vanjskih poslova Japana danas boravi u našoj zemlji, a za Oslobođenje piše o odnosu zvaničnog Tokija i Bosne i Hercegovine i podršci koju nam pruža Zemlja izlazećeg sunca

Japan također pruža podršku Bosni i Hercegovini kroz kultivaciju ljudskih resursa na kojima se oslanja budućnost ove zemlje, a sam sadržaj ove vrste podrške je raznolik i obuhvata sve od polja zdravstvene zaštite do polja prevencije prirodnih katastrofa. Na primjer, proteklih godina dali smo podršku jačanju medicinskog i zdravstvenog sistema za poboljšanje kvaliteta života građana Bosne i Hercegovine, podršku jačanju kapaciteta upravljanja granicom, što je od suštinskog značaja za napredak u procesu pristupanja Evropskoj uniji, te organizovali seminare i radionice u vezi sa prevencijom i ublažavanjem prirodnih katastrofa.

Pored toga, japanske kompanije su počele da ulaze na tržište Bosne i Hercegovine, a bilo je i slučajeva da su japanske kompanije konsolidovale svoje poslovanje u Evropi i proširile svoje fabrike na teritoriji Bosne i Hercegovine. Nadam se da će stabilnost zemlje i napredak u raznim reformama dovesti do daljeg širenja japanskih kompanija na njenom teritoriju. Na ovaj način, jačanje ekonomskih veza između Bosne i Hercegovine i Japana dovest će do mira i stabilnosti u bh. društvu, a u konačnici i na Zapadnom Balkanu. Imajući to na umu, Vlada Japana će nastaviti da snažno podržava širenje japanskih kompanija u zemljama Zapadnog Balkana, uključujući i Bosnu i Hercegovinu.

Tokom svoje posjete namjeravam se sastati sa predsjedavajućom Vijeća ministara, gospođom Krišto, ministrom vanjskih poslova, gospodinom Konakovićem i visokim predstavnikom, gospodinom Schmidtom kako bismo razgovarali o daljoj saradnji između naše dvije zemlje, uključujući promociju pomirenja i povezanost u regionu Zapadnog Balkana.

Važnost WPS-a: Japan promovira Žene, mir i sigurnost (Women, Peace, Security – WPS), inicijativu usvojenu od Vijeća sigurnosti UN-a 2000. godine, kao jednu od svojih glavnih vanjskopolitičkih inicijativa. Ova politika se zasniva na ideji da nas učestće žena u prevenciji sukoba, rekonstrukciji i izgradnji mira sa njihovih vlastitih liderskih pozicija može približiti ostvarenju održivijeg mira. Tokom ove posjete, također namjeravam da se sastanem i razgovaram sa zvaničnicima UN agencija i lokalnim nevladinim organizacijama koje rade na WPS-u. Dalje ćemo jačati našu saradnju sa Bosnom i Hercegovinom u cilju realizacije održivog mira u regionu Balkana i u međunarodnoj zajednici na osnovu WPS perspektive.

Uloga Bosne i Hercegovine u očuvanju mira: Tokom ove posjete, posjetit ću Galeriju Srebrenica 11/07/95. Čak i danas, sukobi i dalje bjesne u raznim dijelovima svijeta. Posjetom izložbe o Srebrenici želim se dotaći historije rata u Bosni i još jednom utvrditi koliko tragediju donosi rat, te kolika je važnost mira.

Kako ulazimo u ovu novu fazu napretka u procesu pristupanja EU, iskreno se nadam da će građani Bosne i Hercegovine, a posebno njihni politički lideri, intenzivirati svoje napore na promoviranju jedinstva i pomirenja, s ciljem izgradnje svijetle budućnosti za ovu zemlju i njen narod.

Nadam se i da će, nadovezujući se na dobre odnose koji su uspostavljeni između naše dvije zemlje, moja posjeta biti prilika za daljnji razvoj odnosa između Japana i Bosne i Hercegovine. Istovremeno, kao članica Vijeća za implementaciju mira, nastaviti ćemo podržavati aktivnosti visokog predstavnika i doprinositi stabilnosti i izgradnji države u Bosni i Hercegovini.